

MUNDARTECKE SENNWALD

De Hansli isch Soldat

I wött, i chönnt dahoa jetz sii
Im Sennwald unn, am junga Rhii.
Zit bis zum Uurloub isch bald umma,
I hörar im Bluescht scho d Imma summa.

Jo senawia – wenn d Hoawea hescht
So chomm zum Tanz as Bongertfescht!
Ii planga oo, so gimmer Pscheid!
Du phönnsch mi bloass im nöja Chleid!

I chocha dir en Fenz und Ribel
Und schütt da Loobsagg undrem Gibel.
Din Bart söttscht scheera vor em spinna,
ma sött si voor- nüd noheer psinna!
Und hesch du chaalti Hend und Boa:
Im Oofa bröötlend Chriesistöa!

D Brut isch paraat mit Gschiar und Wiaga,
Sött nu no d Hoestiggutscha kriaga.
Wenn t eaner chunnsch, so isch o recht,
I tanz bis daar no mit em Chnecht!

I wött min Deanscht wär morn scho z End,
Hett truchni Füess und warmi Hend,
Am Oofa zui, im oagna Hüttli,
Zur Stubeti, zur Stöer bim Brüttli.

So chomm wenn t witt! So chomm halt bald!
I planga lang scho im Sennwald !

*

Der Sennwalder Fabrikant **Richard Aebi** (1915–1990) betätigte sich in seiner Freizeit als Hobby-Historiker und -dichter. Überarbeitung: Judith Kessler, Gams. Die Mundartecke wird von der Historisch-Heimatkundlichen Vereinigung der Region Werdenberg betreut.